

PREDGOVOR

Specijalistički rad “Upis u sudski registar privrednih subjekata Bosne i Hercegovine” prikazuje proces osnivanja privrednih subjekata u Bosni i Hercegovini. U radu se daje kratak osvrt na sam značaj instituta “registar” i “registracija” i način registracije privrednih subjekata na prostoru bivše Jugoslavije i zemljama iz okruženja Bosne i Hercegovine.

Ovaj rad obrađuje jedan veoma značajan i specifičan postupak u kojem se uređuju sve pravne radnje, odnosno postupci usmjereni na “stvaranje” privrednog subjekta.

Obrada ove teme je veoma značajna, jer je broj radova objavljenih na ovu temu veoma mali, što upućuje na zaključak da se u prošlosti ovoj materiji nije značajnije poklanjala pažnja.

Značaj teme ovog rada je utoliko veći kada se ima u vidu da broj privrednih subjekata, karakter njihovog vlasništva i liberalizacija procesa osnivanja i registracije istih ukazuju na odnose u samom društvu svake dotične države.

Shodno iskustvu stečenom prvenstveno radom, znanju stečenom u toku specijalističkog obrazovanja, dostupnom fondu literature i originalnim prepisima koji su mi bili na raspolaganju, namjera mi je da, kroz ovaj rad, dodatno obradim proces registracije privrednih subjekata u Bosni i Hercegovini u duhu novih zakonskih propisa i sveopštih društvenih reformi, posebno u procesu ispunjavanja svih pretpostavki za učlanjenje Bosne i Hercegovine u Evropsku uniju.

Nadam se da će ovaj rad korisno poslužiti svima koji se bave ovom materijom ili je izučavaju.